

灼

艾

集

灼艾新集目錄

上卷

西征記

懸笥瑣探

青溪暇筆

蘇談

清夜錄

病逸漫記

夷白齋詩話

讀書筆記

瑯琊漫抄

簪曝偶談

剪勝野聞

東谷贅言

西湖遊覽志餘

彭文憲公筆記

下卷

冷齋夜話

碧里雜存

名臣經濟錄

灼艾新集目錄終

灼艾新集上卷

四明萬表選集

男達甫訂証  
孫邦孚重梓

西征記

桐君祠西有羣山蜿蜒如兩虵對走三江之水  
並流兩閭驚波闖馳秀壁雙峙上有漢嚴子陵  
釣臺孤峯特操聳立千仞奔走名利爲塵垢中  
客者一過其下清風襲人便有芥視功名歎

自儀真至維揚曰揚州自維揚至山陽曰楚州  
至淮陰登韓信廟使人扼吭太息思昔帶長劍

游五陵俛首出惡少年跨下氣帖帖然不敢喘  
何其弱也。及其登壇佩大將軍印虜魏豹滅項  
籍斬成安君泚水上名動諸侯南面稱孤又何  
壯也。觀其用兵制勝神授鬼畫出入古兵法中  
言取楚三策如指諸掌何其智也。烏盡弓藏免  
死狗烹雲夢之擒未幾而死於婦人之手又何  
其愚也。大丈夫抱超世絕俗之才負安時經濟  
之略顧用不用何如耳。

懸筍瑣探

兵部尚書靖遠伯王公驥嘗督師征麓川克之

還守南京沈靜有大略嘗閱師覆舟山比問將  
校曰部伍行列若何曰隊各五十人始爲一字  
列聞鼓聲則變而爲方圓斜直之勢今日所校  
練是也公笑曰此何以約束兵五人爲伍必一  
人居中執旗幟四人者立四面此四人者皆聽  
中一人所使中一人恒堅立不動赴敵則五人  
必俱中一人使四人者相顧應四人死中一人  
不得獨生由五人爲二十五人爲一隊最中一  
人執旗稍大以令其四面如前五人之法又倍  
而成五則爲一百二十五人其再倍則爲二百

五十人爲一營左右前後相應而聽于中以一百二十五人分寄四隅與中爲游擊出奇而正共一百二十五人堅駐不動互相倚賴而功可成矣又以五營如前法分布之則正共一千二百五十人更以一千二百五十人如前法爲奇兵游擊則總二千五百人爲一師相機調遣聽於中軍主將一人之令其下由伍而隊由隊而營各有一人爲中中一人者各以將之令令其餘人如是豈有紀律不嚴約束不齊而功不成哉當時將校莫不信服公嘗誨人曰士大夫不

可無憂國之心不可有憂國之言其意甚善而  
所立軍陣法不知本于何人要其所自得者爲  
多也

蘇州知府况公鍾字伯律南昌靖安人始由小  
吏事呂尚書震呂薦其才授禮部主事進郎中  
時仁廟初政令在京五品以上官舉所知鍾舉  
左春坊左中允張宗璉仁廟召問楊文貞公士  
奇曰人皆薦外任下僚者鍾何乃舉朕官官文  
貞公對曰臣與王直方欲擬薦宗璉不意遂爲  
鍾所先耳仁廟大喜曰鍾知宗璉亦可謂賢矣



即日擢宗璉大理寺丞。蓋已有嚮用鍾意。宣廟即位。大臣奏蘇州等九大郡號繁劇難治。遂擢鍾等九人爲知府。皆授爾書以行。公至蘇。廉察官吏。去太甚者四五人。嚴禁狡猾。而惠愛窮弱。執勢家侈恣不法者。立杖殺之。吏民大驚。奉令唯謹。又表除京運米二十餘萬。儒生孤寒者多有所給。於是爭獻詩頌。鄒亮獻二十詩。鍾獨稱賞。欲薦其才於朝。會有以匿名書數亮過失。潛揭于府治大門者。鍾得書笑曰。彼欲沮吾薦。正速成亮名耳。遂奏亮才學可用。召試有驗。授吏

刑二部司務轉監察御史其勇于爲義類如此  
歲滿去民叩闕乞留者八萬餘人有儒生爲歌  
謠曰况太守民父母早歸來慰田叟又曰况青  
天朝命宣早歸來在明年時已有代鍾者竟易  
去文貞公贈之以詩有曰十年不媿趙清獻七  
邑重迎張益州又數年鍾卒吏民多塗泣送其  
柩歸其政績具見張修撰洪所著傳

左都御史軒公輒持已甚嚴遇人無問賢否悉  
峻拒之不與接居南都歲時詣禮部拜表慶賀  
至則屏居一室撤去侍燭朝服端坐寒無一言

待鼓嚴而出禮既畢不告于同事者竟御肩輿而歸同事者聞其來亦不樂與處皆避去平生俊偉之節惟恃公續之存間令吏寫數十大冊以爲他日傳世考此足矣於紀載之文一無所好及卒朝廷修英廟實錄從其家求公行實無有也惟寫生卒年月送官耳

成化丙戌十一月朔日予自西華抵扶溝明日坐堂上見有若霧者從東來著樹并草莖皆白少頃堆積枝柯間玲瓏雕鏤甚怪問輿皂此何物曰樹孝也因檢王笥集有云冰凌禾稼達官

怕旣而聞河南李少保賢有疾十二月十四日  
竟卒大夫之所繫固重也夫

慎則免侮謙則免妬默則免惡廉則免禍勤則  
免悞此五者廢一焉求免不可得已

五代葛從簡爲忠武節度使聞許州富人王  
帶欲之而不可得遣二卒夜入其家殺而取之  
夜卒踰垣隱木間見其夫婦相待如賓二卒嘆  
曰吾公欲敘其寶而害斯人吾必不免因躍出  
而告之使其速以帶獻遂踰垣而去不知其所  
之此與晉使鉏麇刺趙盾事相侶盾篤於君臣

富人篤於夫婦皆足以感人益見夫理民彛之不可滅如此

青溪暇筆

太祖高皇帝以至正十五年乙未取安慶及太平寧國趙雙刀陷池州時余忠宣公守安慶使判官莫倫赤市鹽浙東還泊龍灣時方以兵邀之莫倫赤自稱安慶使者太祖聞之曰余公元名臣使當道皆若之天下豈有亂哉命諸軍勿得侵掠以禮宴勞之遣還且曰告余公善自爲守又曰老趙在池州素無仁心恐汝去不能免

也吾以書與汝至則以示其左右莫倫赤至池  
州果爲所扼以書示之趙省書曰但免汝一死  
耳鹽貨不可得也悉爲所掠而莫倫赤遂得生  
還福按余公之守安慶也趙雙刀陳友諒引群  
盜四面而攻之太祖與之接壤未嘗加以一鏃  
雖曰兵不攻堅然神謀廟筭皆由天縱非一時  
英雄所能知也其時友諒已僭大號據有全楚  
隱然一國而太祖初提一旅之師渡江而東若  
又悉力疲衆以攻堅城不惟頓兵挫銳然自撤  
屏翰身受強敵則亦安能從容俯仰得以殲兵

秣馬以觀四方之釁而出萬全之計哉此其遠  
略爲何如也以是而論余公雖爲元守實爲我  
用豈非天佑國家故使之然乎其後友諒雖下  
安慶然友諒之兵力亦自是漸衰而勃興之朝  
蓋已莫之能禦矣故陳氏不旋踵而滅也臨川  
朱彥昌有弔余公詩一聯云十年血戰身無援  
一旦唇亡齒亦寒下句蓋指友諒而云耳於此  
見受天命者其所云爲固自異也

洪武間翰林應奉唐肅有應制賦海東青一絕  
云雪翮能追萬里風坐令狄兔草間空詞臣不

敢忘規諫却憶當時魏鄭公自記云是日

上御奉天門外西鷹房觀海東青翰林學士宋  
濂因諫曰禽荒古所戒上曰朕聊玩之耳不  
甚好也濂曰亦當防微杜漸上遂起嗚呼我  
大祖聖明天縱固非唐太宗所能肖然宋公之  
直誠不在鄭公之下而肅之詩亦可謂善於規  
諷矣此雖一事可以見當時君臣相得之際如  
此其盛也

李淑通名泰鹿邑人洪武末爲詹事府通事舍  
人云太祖恒誦唐人李山甫上元懷古詩吟哦



不絕且大書置屏間其詩曰南朝天子愛風流  
盡守江山不到頭。總爲戰爭收拾得。却因歌舞  
破除休。堯將道德終無敵。秦把金湯可自由。試  
問繁華何處在。雨花烟草石城秋。嗚呼安不忘  
危。天下寧有不致太平者哉。此後王所當法也。  
元滅其臣擁兵不降者。惟擴廓帖木兒。即王保  
保也。太祖嘗獲其家屬。厚恩以招徠之。終不至  
一日大會諸將。問曰。今我朝孰爲好男子。或對  
曰。常遇春領兵不過十萬。所向克捷。此好男子  
也。上曰。未若王保保。斯所謂好男子也。聖訓

蓋欲倡勇敢使諸將思自憤耳其後民間凡遇有微勞自矜者則誚之曰嘗西邊掌德王保保來邪至今遂成諺語薛志道云擴廓帖木兒乃曰王保土者自以家世封王故以王爲姓今旗手衛王指揮乃其族孫也

洪武初欲於南京獅子山頂作闕江樓上未造太祖先令儒臣作記即曰文成上覽之曰乏人知昔唐太宗繁工役好戰鬪官人徐克容猶上疏曰地廣非久安之道人勞乃易亂之源東戍遼海西接崑丘誠可也今所答皆順其欲則

唐婦人過今儒者又曰昔與君同遊者皆和而不同今與我遊者皆同而不和樓竟不作乃試作記者耳

洪武初中書左丞王溥微時與母避兵貴溪山中旋失其母所在入國朝已十五年思母不置忽夢母告以所在命卜者筮之曰非岩非穴厥得朽骨因躬率士卒入山求之哀號三日夜有居人能言母避兵時病不能行即自投井中死乃披荆榛覓井忽有鼠自井中躍入溥懷中旋復入井乃浚井索之遂得母骨葬焉嗚呼謂孝

誠不能感天者觀此可以見矣

前代藏書之富無逾本朝末樂辛丑北京大內  
新成勅翰林院凡南內文淵閣所貯古今一切  
書籍自有一部至有百部各取一部送至北京  
餘悉封識收貯如故時修撰陳循如數取進得  
一百櫃督舟十艘載以赴京至正統己巳南內  
大災文淵閣向所藏之書悉爲灰燼此豈非書  
之厄會也歟

近一僧自西域來貌若四十餘通中國語自言  
六十歲矣不御飲食日嚼棗果數枚所坐一龕

僅容其身欲入定則命人鎖龕門加紙密封之或經月餘鏐欬之聲亦絕人以爲化去潛聽之但聞指念珠歷歷濟川楊景方嘗館其家有叩其術者則勸人少思少睡少食耳一切布施皆不受曰吾無用也予親見兩花臺南回回寺中此與希夷一睡數月何異可見異人無世無之

蘇談

韓公永熙作鎮兩廣時峒蠻方熾公深追之斬大藤峽嶺表悉安梧州兩廣中界也公於此開都府聽治焉門列畫鼓數十面每有出入則撾

之以爲節凡給侍左右皆三品指使盡極一時  
之富貴其尊嚴擬於王公也公度量宏大每賓  
客過必有厚贈軍前取資無筭而士氣懾伏無  
敢有不盡力者諸蠻因是遂屏息不出至于今  
猶公之功也然公得謗亦竟坐用侈一事云尔  
及後代者至則拘拘繩墨無復公之洞達矣當  
公之時廣中兩司自正使而下交代皆至梧州  
叅謁候於門下若小吏然及見則長跪白事惴  
惴不敢以方面自居也及公歸後凡易四五人  
皆不得然矣惟交代一見爲不廢也則知公之

威遠豈可以時輩小節求之乎

周文襄公以侍郎初蒞美化未孚歲適不登人  
譏之曰周白地文襄咲曰今年呼我周白地明  
年教汝米鋪地治未踰年粟米盈美民間銀十  
兩至糴米五十石

酒之爲害有至酷烈者尊生之士不可不知也  
成化中故崇真宮道士龔尚賢飲燒酒過多夜  
向卧吹燈引火入喉中燒死是事非遠數年間  
耳大抵酒皆有火非但燒酒也然世固有一生  
飲酒而壽者吳中蔣大卿平生未嘗一夕脫於

姬妾其飲酒至百鍾不醉今年九十餘猶日行  
數十里則亦其稟受之厚有酒色不得而損者  
平若曰酒色不能害人則非也然不飲酒而得  
壽者世固多有之吾家先伯祖老亦不絕姬妾  
惟不飲酒壽九十一而沒又母族之一長者曹  
翁居京師年九十餘步履如壯人問其飲酒亦  
涓滴不飲也則可知飲酒之能損壽矣余以爲  
蔣大卿之飲酒得壽此自其得於天者厚耳不  
可學也吾家二老之不能飲酒登九十則養生  
者宜師之雖不能必如二老要亦有此理也若



龔尚賢則其死信不由命可爲狂飲者之深戒也

清夜錄

曹翰貶汝州有中使來翰泣曰衆口食貧不能活以袂封故衣一包質十千中使回奏之太宗開視乃一畫障題曰下江南圖惻然憐之召還東坡先生嘗偶遇坐客行一令以兩卦名證一故事一人云孟嘗門下三千客大有同人一人云光武兵渡滹沱河旣濟未濟一人云劉寬婢羹汚朝衣家人小過先生云牛僧孺父子犯罪

先斬小畜後斬六畜蓋爲荆公父子發也

蔡京客張鬻初入館即教諸生習走諸生請其  
故曰爾父祖誤國指日喪亂惟有奔竄可以脫  
死元長置酒求教荅曰事已至此無可言者姑  
收拾人材以補萬一然亦無及矣元長淚下乃  
叙劉元城等官召楊龜山諸人而專以報復爲  
急崇尚虛文爲務當時語曰不籍軍人而籍黨  
人不理防秋而理春秋

病逸漫記

英廟有意江南買辦諸學士難言欲持不可而

有禎度不可言將入對給學士薛瑄云予苦多  
言恐忤上意若度稍可當從後觸止之瑄以  
爲信於其語半時其後有禎即大聲曰薛瑄欲  
有所言上問言何事瑄倉卒無對即以買辦  
一事言之上不悅而罷

太僕司丞十二員分管北直隸山東河南地方  
三年一易孳生馬匹一牡三牝爲一群一歲產  
駒三匹三年差內官車駕主事太僕少卿各一  
員印烙俵散其送至寺者則給與順天府寄養  
每歲江南北共納馬二萬匹江南折銀十兩一

匹歲收烙馬一百匹印馬駒用種字印大馬用  
江字印遼東養馬皆恩軍國初以富民充  
專養馬匹不以征進馬毛稀毳而齒少者是  
老馬所產馬眼光照人見全身者其齒最少照  
半身者滿十歲所照漸短其齒愈大又云識馬  
有病與無病取其毛附手掌中相粘者爲無病  
少粘則有病

南京飯貧米領於光祿寺內官主之其米悉皆  
白糧

魏城北甲乙丙丁戊五庫與天財承運等庫賊

罰銀香料等項最富。輓城內文華殿南是內承運庫以藏銀絹除歲用外其餘皆入內女官庫。雲南各處礦銀各開辦銀若干各入女官庫。其各處折糧銀有一項入太倉以備邊用。歲送西北諸處三十餘萬兩。

兵部尚書鄺野一日與恭順侯吳某取五軍軍數恭順聞於上。鄺走謝以軍之數非外人所預知此祖宗舊制。

東宮官典璽局郎覃吉廣西人自云九歲入內。余初在內書館教小內官使吉提督因識其人。

亦一溫雅誠篤之士識大體通書史議論方正  
雖儒生不能過輔導東宮之功爲多大學中庸  
論語等書皆其口授動作舉止悉導以正暇則  
開說五府六部及天下民情農桑軍務以至宦  
官專權蠹國情弊悉直言之曰吾老矣安望富  
貴但得天下有賢主足矣上嘗賜東宮五莊  
吉備曉以不當受曰天下山河皆主所有何以  
莊爲徒勞傷財爲左右之利而已竟辭之東  
宮嘗隨老伴念高王經而吉適至殿下駭曰老  
伴來矣即以孝經自携吉跪曰主得無念經

乎曰否吾才讀孝經爾其見畏特如此 東宮  
出講必使左右迎請講官講畢則語 東宮官  
云先生喫茶局丞張端頗不爲然吉日尊師重  
傳禮當如此姑記此三事以傳後人

王觀安慶人狀元及第官至學士丞旨靖難兵  
至南京金川門觀走死一妻二女俱被執不旨  
配象奴妻詭言避難時將有金銀若干寄城外  
某至親家須吾母女去取方與不爾必爲其所  
匿象奴利其物因與俱往至城門市人填隘妻  
云吾母膏當以衣裾幅相結恐稠人中相失不

便奴許之。因固結之。其二女亦不解母意。比至江側。遂繫二女同溺水死。

夷白齋詩話

李南所先生蒿隱居陽山。以詩酒自娛。性狷介。不妄交游。日惟獨憑一几。焚香玩易而已。所居之室。扁曰學易處。其於死生禍福之說。尤爲洞達。嘗有詩云。一室焚香几獨憑。蕭然興味似山僧。不緣嬾出忘巾櫛。免得時人有愛憎。年七十二。病亟。家人迎醫。閉目搖手曰。數盡矣。留連何益。竟坐逝。嘉靖壬辰六月十七日也。



越僧某索畫於石田翁嘗寄一絕云寄將一幅  
剡溪藤江面青山盡幾層筆到斷崖泉落處石  
邊添個看雲僧石田欣然畫其詩意答之余謂  
僧詩盡矣何以圖爲

陳可與讀書虎丘嘗作歌招余其略云山人早  
掛席訪我山中客清夜焚妙香蘿月灑石壁寒  
泉煮石鎗細酌話疇昔又云山人山人招不來  
白日下界多塵埃牛毛世事幾時開一物於我  
何有哉余嘗乘月泛舟訪可與虎丘精舍又贈  
余詩有山中正思爾良夜喜相過之句戊子五

月可與病亟屬皇甫子浚誌銘屬金懋仁葬事  
屬余刻其詩今墓木以拱矣

解元唐寅子畏晚年作詩專用俚語而意愈新  
嘗有詩云不煉金丹不坐禪不爲商賈不耕田  
起來就寫青山賣不使人間造業錢君子可以  
知其養矣

虎丘石壁舊有景仁自中朝持劔南東州節道  
出姑蘇飲餞於虎丘其題名云遠峯沐雨幽軒  
進風古木晝陰野禽春聲尊鱸膾季鷹之高劔  
潭吊闔閭之古碁酣而世慮忘酒竟而別愁起

促駕言歸援毫以識紹定五年四月二十日余  
少時尚及見之今蘚苔漫滅竟不知在何處姑  
識之

余少時嘗聞常熟一暴富者與鄉人方交易買  
田有一道人來乞食主人怒其擾聒呵出之道  
人書一絕於其壁云多買莊田笑汝痴解頭糧  
長後邊隨看他耕種幾年去交付兒孫賣與誰  
近來吳中多田之家即僉糧長州司取剥陪償  
終則箠楚禁錮連年莫脫其勢不至傾家蕩產  
不止也是以人懲其累有知者皆不售田吳人

所以畏後如畏死道人之言切中時禍不獨爲  
常熟發也

讀書筆記

學貴有常又貴日新日新若異於有常然有常  
日新之本也

視聽持行耳目四肢自然之功也聰明運動耳  
目四肢自然之本也人惟其自然也是以功不  
亂而効自著至於心乃不任其自然而擾之欲  
其虛靈而功效之得也難矣

善觀人者觀已善觀已者觀心

犬見人衣貌之不揚則吠之稍整則亦稍戢蓋  
彼惟知外美之可貴也人之知宜辯於犬矣乃  
亦唯富貴之敬貧賤之忽而不計其賢否何如  
是猶犬耳

爲文作字初無意於必佳乃佳凡事皆然不但  
文字也

瑯琊漫抄

太祖初渡江至采石駐薛嫗家饑甚坐穀籠架  
上問嫗此何物對曰籠牀烹線雞爲食問何肉  
曰鍛雞飯以大麥曰仁飯太祖默喜蓋籠牀

登基人犯皆吉語也天下既定召嫗賞之  
站船用粉塗地然後加彩高皇聖製也南京  
功臣廟画壁與陳漢大戰高皇乘白船友諒  
紅船旣平漢命以紅船入遞運裝囚白者加彩  
載使臣亦守廟相傳之言或有此事但近時所  
乘皆無所謂白者矣惟北方尚有此制

簷曝偶談

梟逢鳩曰子將安之梟曰鄉人皆惡我鳴將東  
徙鳩曰子能更鳴可矣不能更鳴東徙猶惡乎  
之聲世有惡人焉一國非之而不顧天不非之

而不顧方且揚眉吐氣侈然自得以爲人莫敢  
余侮也旣不能更鳴又不能東徙則又梟之耻  
矣

凡山居者先須識道而未識道而先居山但見  
其山不見其道故心境未通觸物成壅則鬱鬱  
長林叢叢聳峭鳥獸鳴咽松竹森梢水石崢嶸  
風枝蕭索藤蘿縈絆雲霧氤氲適足以資其喧  
耳

鄉忌謂妻曰我與城北徐君孰美妻曰美於徐  
君忌不自信復問其妾妾曰徐君何能及君也

旦日客來又問之客曰徐不若君之美也曰曰  
徐君來孰視自以爲不如窺鏡而自視又不如  
遠甚暮寢思之曰吾妻之美我者私我也妾之  
美我者畏我也客之美我者欲有求我也此乃  
忌說齊王受諫然則諫之直可不受哉不然諛  
言日至矣

凡人溺死者以鴨血灌之可活

東谷所見云造化之於人不斷於功名富貴而  
獨靳於閒天地之間機發輪轉無一息停焉天  
地且不得閒而閒豈人之所易哉高爵厚祿清



資顯轍不知其幾其間樂恬退者甚鮮日惟買田營第不獲一見而先身亡者有矣又有被劾之餘安意家食非其本心也而廼築室返耕高索自許一入私室作搖尾乞憐之言於平時求進之牆囊篋鎖鑰惴惴於手收支簿書介於懷一日十二時無一隙得暇所謂好山好水清風明月何嘗見此風景縱或見之又何嘗識此旨趣勞上擾上死而後已若夫富家翁守錢虜又不足道也故曰不是閒人閒不得閒人不是等閒人

富鄭公云宅居山水之人其別有五有貧以樵  
釣爲業者有好釋老之學欲逃生死者有以德  
自矜託名高尚而沽聘命者有遭喪亂怖禍以  
避世者有賢而不能退伏著書者是五者處  
山林則一而其所趨則異  
凡有風狗毒蛇咬傷者只以人糞塗傷處極妙  
新冀尤佳諸藥不及此

### 剪勝野聞

太祖在滁嘗濯手於栢子潭有五蛇擾而就之  
因祝之曰如天命在予汝其永附焉一日戰畢

羣坐藉土地忽蜿蜒其側帝乃掩以堦釜頃  
復報戰亟戴堦釜而往是日手刃甚衆軍法戰  
勝必祭甲冑衆推帝與功多乃置其堦釜于  
前甫奠忽霹靂大震白龍天矯自堦釜出挾雷  
聲握火光驤空而去諸將自是畏服

常遇春初附劉聚時常晝寢夢一羽士語之曰  
起此非爾所託也爾主至矣既寤適大祖  
至於是遂傾心焉

徐太傅追元順帝將及之忽傳令班師常遇春  
不知所出大怒馳歸告上曰達反矣追兵不

順帝而已之其謀不可逆也太傅度遇春歸必  
有變乃留兵鎮北平而自引軍歸駐舟江浦伏  
劍入謁帝時方盛怒宿戒閹吏曰達入慎毋  
縱之達旣入未見帝自疑有變乃拔劍斬閹  
吏奪關而出帝因使人釋其罪令內謁達不  
可於是帝不得已往視於舟中達因進曰達  
有異圖不啓今日雖曰晚矣然吾臨江鞠旅亦  
能撫有江淮顧弗爲耳且吾之不擒元帝亦壽  
之熟矣彼雖微也嘗南御中國我執之以歸汝  
曷治焉天命在爾已知之矣顧達何人敢以白

外帝重感悟結誓而去

太祖於後湖中築一臺以藏天下兵冊避火災也築屢潰乃命曩所誅髑髏爲基其臺卽就太祖勤於庶政每臨食七飭屢廢思得一事卽以片紙書之綴於裳衣或得數事則累然滿身若懸鵜焉臨朝則一一行之

太祖喜微行每至徐太傅家一日太傅病方帝來太傅自枕蓐下出一劔以示帝曰戒之他人得以僂爾也自後諸功臣家不復至矣太祖嘗微行里市間遇國子監生某者入酒坊

帝揖而問之曰先生亦過酒家飲乎對曰旅次  
草草聊寄食耳帝因與之入時坐客滿素唯  
供土地神几尚餘上移之在地曰神姑讓我  
坐乃與生對席問其鄉里曰某四川重慶人也  
帝因屬詞曰千里爲重上水重山重慶府生應  
聲曰一人成大大邦大國大明君帝又舉簃  
几小木命生賦詩因喻已意辭曰寸木元從斧  
削成每於低處立功名他時若得臺端用要向  
人間治不平帝私喜因探錢償酒家而去生  
不知爲帝也明日忽移召上生入謁生茫然

自失既至 上咲曰秀才憶昨與天子對席乎  
生惶恐謝罪又曰爾欲登臺端乎遂命爲按察  
使秣陵人家至今供土地神在地

僧宗泐性頗慧 太祖愛之忽令其養髮上成  
欲官之泐固辭乃止 上嘗戲命往西土求內  
典泐不敢辭行至外土道逢一老僧泐遙拜之  
曰西域去此幾何老僧曰爾頭白行不到也泐  
曰明天子命往覓經唯老師指教老僧曰毋行  
抵自勞耳爲我致書 明天子慎毋發也泐受  
之歸見 帝具道所以 帝發書視之乃 帝

即位時作水陸齋以答神貺手書表文也紙墨  
如故 帝允之乃 太祖在軍中甚喜閱經史  
遂能操筆成文章嘗謂侍臣曰我本野人未嘗  
從師指授然讀書成文釋然自順豈非天乎

### 東谷贅言

或告予曰有孝子某者鄉人稱爲君子也兼遇  
恩例以孝名受覃霽頃因割產與兄閱牆予曰  
爲孝子而薄天倫則其所謂孝者豈其然乎吾  
聞惟孝友于兄弟朱聞不友而能孝者也是故  
克戔手駢者不及黃泉誓不見母跽血玄武門



者環兵海池震驚若翁

古來固有凶人一變而爲吉人者亦有清流一變而爲濁流者意罔念克念其機在我而由人乎哉是故周孝侯惡少也斬蛟伐虎遂立功名永貞八司馬皆茂材異等也乃朶頤叔文之鼎而萬事瓦裂

人有恒言霜降水涸涯涘乃見諺曰若不同床卧安知被裏破蓋朋之盍簪誰無情誼必要其終然後見君子小人之用心管東坡謫海南故人巢谷年已七十三矣自蜀往唁之死諸途予

於此見君子交誼之真也伊川編管涪州或諷其故人邢恕救之恕曰便斬程頤萬段恕亦不救予於此見小人反覆之情也

古之奸雄巧於用術往往神出鬼沒於至深至險之際自以爲笑無遺策也殊不知天不容僞祇自斃焉是故蘇秦能報刺客之仇而不能逃其匕首之害呂不韋能匿祖龍之胎而不能免其遷蜀之謫

唐憲宗以節度使王鐸帶宰相之銜李藩以筆塗詔附奏曰不可宋真宗以劉美入爲貴妃李

沈引燭焚詔而附奏曰不可嗚呼二公可謂能  
執大臣吁咈之義矣然竊有說焉古者人臣不  
敢諫君之路馬孔子過君虛位必執然變色蓋  
敬君之禮固當然者况詔王言也而輒塗之而  
輒焚之可乎向使天子震怒而下吏議則不敬  
之罪二公將何詞以自解大抵人臣居密勿之  
地君有過舉執奏可也塗詔不可也焚詔不可  
也

張忠定公守成都日合軍大閱始出城衆皆羅  
拜呼萬歲公亦下馬東拜呼萬歲復攬轡徐行

衆不敢譁夫軍士擁郡將呼萬歲是無君也無  
君根於怨望也而怨望之來豈一朝夕之故哉  
公胡不能炳幾銷釁直待其譁焉而後靖之亦  
晚矣向非公之忠誠有以厭服其邪志吾恐嵩  
呼不已必至黃袍加身黃袍加身則成騎虎之  
勢而劒閣王壘之區人心搖矣當其時公將何  
辭以聞天子而謝天下

或問孟子言孔子成春秋而亂臣賊子懼獨不  
言君父懼者何也予曰春秋之意莫大於尊君  
父討亂賊夫亂賊既討則聖人之斧鉞在春秋

而後死者懼而君父尊矣君父尊則君父慶矣  
奚懼哉嘗觀古來固有君而不君父而不父者  
矣忠臣孝子之心以爲君父天也天可逃耶是  
故西伯不怨姜里之囚也申生不怨新城之死  
也又嘗觀古之君子傷一代人倫之變亦未聞  
罪人君父者是故湯武奉天討誅獨夫而巢伯  
不罪桀也夷齊不罪紂也桃園之變董狐不罪  
靈公也棠姜之禍南史不罪莊公也知此則孟  
子不言君父懼者所以存萬世之防也嚴哉  
人莫不有死也惡之欲其死者衆人之情也愛

之欲其死者。君子之心也。夫既愛之矣。又欲其死。何哉。蓋所愛有重於死者。先民有言。網常九鼎。生死一毛。是故南霽雲被執而未死。張睢陽大呼男兒。以速其死。文丞相被執而未死。王鼎翁作生祭文。以速其死。

石碣教子以義。其子厚不從而甘心爲逆黨。陳萬年教子以諂。其子咸不從而卓然爲名臣。噫。子之不係世類也如此哉。

程太中夫人曰。子之不肖。皆因母蔽其過。而父不知。予謂婦人之仁過於姑息也。其敗子也恒。

多

或問君親有疾禱於鬼神以求福有是理乎予  
曰古人有行之者矣昔武王弗豫周公禱於三  
王求以身代庾黔婁因父疾篤禱於北辰求以  
身代是皆臣子迫切之至情夫豈索之茫昧者  
哉且病者卧榻奏藥罔功其心皇七惟冀鬼神  
陰佑之一聞有禱躍然快心或若起之而疾或  
蘇矣况感應之理又有不可誣者是則禱云禱  
云庸非佐助醫藥之一術乎母執曰死生有命  
不可禱也若自身有疾執焉可也

小人之交外親而內疎始合而終叛君子之交則內外始終一也故君子無黨小人無朋君子無賣友之心小人無久要之信

或謂人有恒言妻乘夫何謂也予曰乘之爲言馭馬之名也六轡在手鑿耶控耶皆如所欲曷敢有越志哉豔妻悍妻之乘夫也亦然或曰甘心受乘者惟懦夫愚夫則然彼英武之夫肯爾耶予曰不然彼單騎出走入山谷二十里而終夜不返者非英武之夫耶蓋受其乘也習矣且柰何哉書曰牝雞之晨惟家之索言乘夫者凶



也大抵骨肉厲階房幃烈禍皆起於茲非凶而何

元世祖欲盡殺人以中國爲牧馬草場賴耶律楚材諫而止予曰華夷天所限也元人逆天欲滅我華夏而夷之其一念之毒上通於天是諫也天贊之也昔劉定公覩雒汭安流而思禹功曰微禹吾其魚乎予亦曰微耶律文正王吾其馬乎

董公發義帝之喪紀信代漢王之死周苛烹項羽之鼎論開國之勲三子當以山河帶礪之誓

加恤典焉可也胡爲殿上論功之日曾無一言  
及此漢真少恩哉

水覆舟航人不怨水。火焚室廬人不怨火。食傷  
脾胃人不怨食。色蠱元精人不怨色。四者之害  
果物之咎耶。抑御物者之咎耶。是以君子貴自  
怨自艾。

凡行事覺得本心有不安則人心必不悅甚則  
怨。七則仇仇則敗。乃公事故君子謹始慮終者  
慮其敗也能慮敗者不敗。

或問鈍子曰有天之鈍有人之鈍心求通而未

得口欲言而未能鈍之命於天者也大辨若訥  
大巧若拙鈍之習於人者也夫君子之處世也  
敏於天者必求鈍之君子之爲學也鈍於天者  
必求敏之敏其鈍者困心衡慮不冥頑也鈍其  
敏者歲鋒歛鍔不揮霍也不冥頑者不自棄也  
不揮霍者不自傷也

莊子曰庖人雖不善割尸祝不越樽俎而代之  
予謂尸祝代庖是出位也彼庖之不善者匪用  
爲德且將疑其病已而銜之矣知此說者處明  
友寮案之間因事納忠以達不逮者尚慎旃哉

嘗見極余錄中有曰稱人之善或過其實不失為君子揚人之惡或損其真寧免為小人予謂此語可謂善善長惡惡短之註疏也

潛溪宋太史歸田之日銘于楹曰積丘山之善尚未為君子貪絲毫之利便陷於小人嗚呼吾輩當念之哉

楊子雲曰高明之家鬼瞰其室或疑斯言也幾於恠予曰害盈福謙鬼所司也高明氣焰之家其惡易盈鬼寔瞰之將以降之百殃此固感應自然之理無足恠者雖然必瞰于室何也予曰

凡欺天罔人之惡多萌芽於暗室之中以爲人莫我知也殊不知宜鑒孔昭恒在茲哉

廬山之麓有老儒杜了翁被服造次必於儒者或勸之從陽明子講道了翁曰吾聞聖人之道在論語其於其中言忠信行篤敬六字敏求之四十餘年未之有得又惡乎講哉或曰道豈言行盡耶了翁曰吾聞言行君子之樞機榮辱之主也又聞言行君子之所以動天地也若外言行而講道某不願聞也他日陽明子聞之嘆也不可謂深山窮谷無人

曹月川洛中名儒也里中曾有二叟訪之留宿  
一叟劇談勢利紛華口沕津津如海夫逐臭一  
叟沉默寡言少馬畧談及尋幽吊古之事真想  
蕭然飲罷或問優劣月川曰一叟是黑風暗雨  
胸襟一叟是青山白雲胸襟

番禺陳兩峯先生白沙高第也來升清江予爲  
諸生獨蒙與潔一日侍几杖請問古人作文之  
法兩峯曰論語是夫子短文章繫辭是夫子長  
文章孟子七篇是斬釘截鐵雄辯文章子潛心  
而求之則機杼在焉經緯在焉山龍華蟲黼黻

在焉竊以爲萬世作文之法無踰此者

晏子曰古者飲酒周觴五獻過之則誅漢法三  
人以上無故羣飲酒者罰金四兩宋法夜聚飲  
酒而曉散者坐死罪皆所以嚴酒禁防酒禍也  
皆祖酒誥執拘歸殺之意也我

朝無崇飲夜飲之禁眡漢詔賜酺五日之澤不  
尤汪濊乎

或問姦人與小人何異予曰敢於爲惡而無忌  
憚者小人也有爲善之名終無爲善之實有爲  
惡之名初無爲惡之跡者姦人也斯人也從君

按所謂制者時王之法也聖人所以憲章文武者以此漢儒所以練達朝章者亦以此近時士子專於博古而畧於通今聞泉齋之言其有激手

宋南渡詔市牛筋五千斤李春奏曰一牛之筋纔四兩是欲屠二萬牛也遂止予觀此奏不以和買擾民爲言只以戕害許多牛命爲言而不忍見其齧觶之狀宛在目前此其所以能感悟君心而諫易入也

我國初都督府軍數大僕寺馬數有禁不許人



知天下版籍藏在玄武湖中迴洲之上有禁不  
許閑人擅過湖觀象臺在鷄鳴山巔歷代簡儀  
渾天儀璇璣玉衡量天測景諸器皆在焉銅以  
崇墉有禁不許閑人擅入其門此皆定鼎金陵  
之日謀國者得請爲禁以杜奸雄窺伺之心其  
志念深哉

先民有言有治人無治法夫所謂無治法者豈  
真無哉蓋執其法而不能變通之是謂徒法徒  
法者有糟粕無神化其何以行之哉是故同一  
兵法也馬服君用之而立戰功其子用之以四

十萬而敗於長平同一青苗法也荆公躬行於  
鄆縣而窮民受其福通行於天下而良民受其  
殃

觀人之色可以知人之心蓋誠於中者必形於  
外苟能即外以占中雖不中不遠矣嘗試觀之  
其色莊者其心詐其色媚者其心諂其色赧者其  
心愧其色戚戚者其心憂其色慘者其心  
心哀其色慄者其心忿其色拂者其心怒  
其色菴者其心屈其色弛者其心驕其色  
不定者其心邪其色易顰易笑者其心淺其色

黜然不露者其心深面無人色者其心懼義形  
于色者其心直正色立朝者其心忠簞食豆羹  
見於色者其心吝造次顛沛而色不變者其心  
有所主不寧惟是又嘗見醫家以色而知人之  
休咎法家以色而知人之曲直應色之時義大  
矣哉

或問羣居應接人事將同耶異耶予曰無室於  
義同可也若苟且而同焉人將鄙之爲鄉愿矣  
有害於義異可也若激仁而異焉人將忌之爲  
怪物矣

予行役麻城謁毛鳳崖先生於山中留宿因問  
請曰先生婆婆立樊以何事爲樂鳳崖曰某平  
居恒以禮義灌溉此心以廉耻潤色此身以勤  
儉訓子孫此外奚所事哉

嘗觀孝弟之風敦於貧賤之族而衰於富貴之  
家蓋貧賤之族骨肉相愛之情真也富貴之家  
利爭奪之私勝也

地有心乎予於復卦見之矣天地有情乎予  
大壯卦見之矣天地有好惡乎予於作善降  
之百祥作不善降之百殃見之矣嗚呼天人相

與之際微哉

問子囊城郢梁伯溝宮其自衛之策何如予  
三子之策雖曰自衛寔自蹙也獨不思郢可  
城也郢之外非楚耶宮可溝也宮之外非梁耶  
城郢自亡楚也溝宮自亡梁也烏在其自衛哉  
未之南也不此之監惴惴然保長江天塹之險  
其後上流失犄角之勢外郡撤藩籬之固卒使  
賈師憲以十三萬之師潰於江上而膳賊更說  
一句不得哀哉

我朝設養濟院以養民之鰥寡而無告者也惠

民藥局以濟疾病之窮者也漏澤園以葬無主  
之死者也課守令積穀而爲發最以賑凶歲之  
饑者也京師有泰厲王國有國厲又有郡厲有  
邑厲有鄉厲以祀鬼之無所歸者也嗚呼仁哉  
東阜劉公患蜀人之訟獄滋豐也嘗語憲使王  
公鴻漸曰越訴誣告律有明條告遠年陳事不  
干已事立案不行例有明條主者施行能不姑  
息則獄之放紛庶其清乎煩以鄙意達諸監司  
自後各道以獄來上者咸勵精焉

馬都督某遼陽名將也一日舟過天津予以憲

職備兵此土往謁之見案上有孫子十三篇因問之曰此書以何者爲兵家之要何者爲兵家之忌都督曰始計篇曰兵者詭道也故能而示之不能用而示之不用近而示之遠遠而示之近利而誘之亂而取之實而備之強而避之怒而撓之卑而驕之佚而勞之親而離之攻其無備出其不意蓋用兵之要莫先於此者軍爭篇曰無邀正正之旗勿擊堂堂之陣高陵勿向背丘勿逆佯敗勿從銳卒勿攻餌兵勿食歸師勿遏圍師必闕窮寇勿追蓋用兵之忌莫先於此

者

前輩教人居官。庶不言貧。勤不言勞。愛民不言  
惠。鋤強不言威。事上致敬。不言屈已。禮賢下士。  
不言志勢。此其所以於官箴無忝於陽明有光。  
子錄水曹郎改刑曹大司宰。崔公命予曰。子知  
用刑之法乎。夫用刑之法。有時也。有節也。因人  
也。以時言之。辰巳以前。囚多枵腹。不可刑之也。  
自夕嚮晦。萬類俱息。人身血氣各有所歸。亦不  
可刑之也。以節言之。人身血氣之訕和受刑。則  
變血本赤者。變而紫焉。氣本溫者。變而熱焉。若



先刑上體後刑下體則血氣之變者奔注於腰  
脊髀腠之間其毒稍緩猶可支也若先刑下體  
後刑上體則血氣之變者衝灌於心肺之竅其  
毒不亦烈乎是以君子刑其一不刑其二以人  
言之彼孱弱之夫膏粱之子見刑而畏者也一  
經拷訊罔不招承能保其無枉乎強梁嚚訟之  
徒其悖戾之氣足以玩刑也終日煅煉莫肯輸  
服豈可信其口中雌黃而直之乎凡此者皆當  
旁求審察以得其情不可專恃乎刑也子其慎  
之

漢高祖與太子手勅曰汝見蕭曹張陳諸公侯  
吾同時人倍年於汝者皆拜并語汝諸弟此西  
京重父執之禮始此宋朝諸老凡同年同官之  
子孫有來謁者皆坐受其拜然後設香案遙拜  
其祖父噫此風厚矣予往時在南都見部寺堂  
上諸老與各署屬官小官作通家世講之會其  
坐次序齒不序爵噫此風亦厚矣

雋不疑斷獄引春秋楊萬里註易引故實蓋引  
經者準古訓以律人釋經者援人事以昭義故  
曰無徵不信蓋謂此耶泉齋邵公有曰易設虛

以待天下無窮之變春秋據實以究天下難隱之情此又明經者所當知

孝陵嘗謂學士詹同曰近世文士不究道德之本不達當世之務故詞雖艱深意實淺近即使過相如揚雄何裨實用自今翰林爲文但取通道理明世務無事浮藻嗚呼大哉王言其所以風勵天下文章之習歸於淳古爾雅也至矣國初江西進陳友諒鏤金床燕京進元順帝水晶宮漏惡其淫巧皆毀之大祀

廟

拜褥褥心以紅布爲之

乾清宮

御床若無金龍在上與中人家卧榻無異  
宮中每日早膳止用蔬菜凡若此類皆以險德  
示天下先

孝陵開天起兵時盛甲藏在此

太廟鐵鎗藏在五鳳樓中采石渡江之舟覆蓋  
在龍江沙上護以朱闌皆所以示創業艱難也  
國初大統既集民物更新元之子孫面縛來降  
以帝王之後免獻俘又以元不戰而奔克順  
天命謚之曰順帝又封其孫爲崇禮侯還之沙  
漠又遣使祭告歷代帝王之陵而禁樵牧又訪

求孔子之後封衍聖公顏子孟子之後封博士  
又立孔顏孟三氏儒學設官以教育三氏子孫  
之秀者而登用之又立尚賓館聘天下名儒梁  
寅徐一夔周子諒胡行簡等修大明集禮又命  
名儒曾七等修元史又命刑部尚書劉惟謙定  
大明律又設文舉武舉二科以網羅天下之英  
才凡若此類皆忠厚惻怛之至郁七乎其文也  
渢七乎其風也嗚呼盛哉

都御史東阜劉公撫蜀時有門生諫垣以書來  
求作司諫歲東阜復書曰老悖學植荒落安能

辨此曾見近科程文載邦有道危言危行一篇  
其中譎語曰事關利害有舉世所不敢言而已  
獨言之幾伏隱微有舉世所不能言而已獨言  
之請以此語書之座右爲司諫箴可也門生得  
書讀之竦然居無何其人正色言事落職授荒  
處士其隱居山中庭有松一株三百年前物也  
縣尹立公署命工師伐之處士斫白書絕句其  
上曰大夫去作棟梁材無復清陰覆綠苔今夜  
月明風露冷悞他雲外鶴歸來乃再拜而送之  
松至縣庭縣尹讀書悵然遂填直而還其松

松溪戴公提學南畿一日艤舟姑蘇之盤門見  
水濱有溺死少艾命縣官掩之又命諸生賦詩  
挽之蔡佃方弱冠賦詩曰芙蓉零落倩誰收飄  
泊孤城野水頭素手尚籠羅袖薄清波難掩玉  
容羞蕪烟綠暗香魂杳花雨紅添血淚流莫向  
盤關歌此曲月明風細不禁愁戴公竒之既而  
對教官惜之曰此子詩有音嚮無氣骨吾恐冬  
華之木不實早慧之子不壽明年蔡佃死  
華陽有狂生粗知押韻一夕乘酣訪鄰曲隱翁  
見主人庭中月色如畫梅花盛開乃朗誦宋人

詩曰牕前一様梅花月添箇詩人便不同蓋自  
負也主人亦朗誦宋人詩曰自從和靖先生死  
見說梅花不要詩蓋恐其作詩唐突梅花狂生  
忿主人嘲已肆詎而去明日生人到縣訟之縣  
官呼狂生試詩甚劣咲謂狂生曰姑免問罪押  
發去百花潭上看守杜工部祠堂聞者絕倒

西湖遊覽志餘

方希直孝孺之從學于太史宋景濂也相得甚  
歡嘗從景濂宿南屏山晨起對雪浩飲高歌意  
氣慷慨後數年景濂薨而鄉人有王生者偶寫



南屏對雪圖索詩于希直希直閱之感嘆陳跡  
遂題詩云昔年歲暮京國還艤舟夜宿南屏山  
山風吹雪天欲壓夜半大雪埋江關清晨倚樓  
望吳越六合玉花飄未絕恍疑江水駕山來萬  
頃銀濤湧城闕山僧好事喜客留置酒開筵樓  
上頭玉堂仙人宋夫子紅顏白髮青貂裘坐談  
古今如指掌共看雲收月華上寒輝素彩相蕩  
摩碧海瑯臺迭蕭爽酒酣擊節心目開慷慨吊  
古思英才荒祠古栢岳王墓廢湖殘柳蘇公臺  
一時佳會難再得仙人上天塵世窄王子何年

繙此圖正貌南屏舊遊跡吾知王也奇崛人新  
詩妙筆俱絕倫偶從揮酒豈無意神授髣髴存  
天真世間今古同龍虎回宮人寂都不見空有  
羅山石室書夜施紅光刻畫漢蓋其時景瀛已  
謝病還山而希直自海上来迂誕近于南屏師  
生道義之情湖山增重矣其曰羅山石室乃景  
瀛公精舍也

王良字文信河南開封人洪武末浙江按察使  
廉潔明峻嘗以忠義自許每晨詣本司岳廟焚  
香矢心蓋慕王之忠烈也革除間良知天下事

將有變預蓄草柴堆積室內靖難師起良語其妻曰吾平生以忠義許國今事至矣汝意何如妻慨然曰大丈夫見義勇爲何用謀及婦人且公旣爲忠臣妾豈不能爲義婦乎唯此數歲兒祀不可絕婢某聰慧至誠必能撫養某食事夫人與我最厚當盡我簪珥與此婢投匿僉事衙若得撫養成成人庶不絕嗣良然之遣婢去乃闔門索火未至而妻已投池中死矣良具衣冠舉火端坐而歿正德年間按察使梁材立祠于本司之東私謚曰忠節云

許亨永樂間以都督僉事鎮守浙江二十餘年  
有惠政廉簡忠勤諸司畏服其卒也哭聲振城  
市雖婦女亦有奔送其喪者山陰秦瑛挽之詩  
云太平無事展珠鈴庭樹沉沉晝掩簾門外日  
高聞劍戟海濱風靜集魚鹽累朝功業金甌重  
一寸忠勤雪鬢添忽報前營將星墜哭聲中夜  
起閭閻

楊繼宗山西人成化九年爲嘉興府廉聲播遠  
近十六年陞浙江按察使民間之皆起首以頌  
其來繼宗至不携家爲止帶老僕一人執爨清

直之聲震動兩浙鎮守太監張慶權勢烜赫門  
下多倚勢生事自繼宗蒞任各斂手杜門不敢  
輕出貪猾官吏多望風引去然繼宗雖嫉邪而  
愛惜人才未嘗輕易害人故人無智愚咸仰其  
公正而畏其威名未幾聞親喪方坐廳理事計  
文忽至卽大哭解印步出驛亭老僕挑兩箬籠  
登舟杭民老稚號泣挽留不及皇皇如失父母  
既去十餘日民相驚言公得奪情復任懼呼載  
道迎候者填溢城門月餘方已

韓邦奇字汝節朝邑人正德末爲浙江按察僉

事靡勁自持時鎮守太監王堂怙勢害人如茶  
筍鱗魚種種勒辦民不聊生汝節數裁抑堂遂  
以沮遏進貢誣之詔錦衣械泊百姓感泣哀動  
城市汝節爲詩云非才尸位聖恩深士庶何勞  
淚滿襟明主昌言神禹度斯民直道葛天心  
還看匣有平津劍更喜囊無暮夜金惆悵此時  
不忍去且維輕舸越江潯

杜京產字景齊錢唐人少恬靜絕意榮宦會稽  
孔覲清剛有峻節一見款交郡召主簿州辟從  
事稱疾去除朝請不就與同郡顧歡交東山開

舍授學孔稚珪表薦京兆曰竊見吳郡杜京產  
潔淨謙虛通和敏達博通子史沈吟道奧家業  
窮巖採芝幽澗麻衣糲食者二十餘載雖古志  
士何以加之謂宜釋巾幽谷結組登朝則岳谷  
含懽薛羅起忤不報後以負外散騎侍郎召京  
產曰莊生持鈞豈爲白璧所回辭疾不就

范元琰字伯珪錢唐人祖悅之太學博士召不  
至父靈瑜居父憂以毀卒元琰時童孺哀慕盡  
禮及長好學博通經史然謙敬不以所長驕人  
祖母患癰常自含吮與人言常恐傷物居家不

出城市。雖獨居。如對嚴賓。見者莫不改容正色。  
家貧。惟以園蔬爲業。嘗出行。見人盜其菰。元琰  
遽退。毋問盜者爲誰。答曰。向所以退。畏其愧耻。  
今言其名。願不泄也。於是母子秘之。或有涉溝  
盜其筍者。元琰因伐木爲橋以渡之。自是盜者  
大慙。一鄉無復草竊。

陳信字履信。仁和人。以推擇爲吏。卽知守廉。一  
錢不取衣食。一仰於家。宣德間。有詔求賢。總兵  
官陽武侯薛祿薦擢大理評事。改南京西城兵  
馬副指揮。以廉能陞蘇州府通判。蘇治煩劇俗。



舊華縻信裁剽無留事而持以確守民甚愛之  
信嘗有公務之京民有餽白金三百兩者不受  
尋乞致仕歸經治所餞贐俱不受前所餽者復  
持金懇納信復却之行李蕭然行路稱嘆蘇人  
杜瓊贈以詩云南還依舊一寒氊又却吳民餽  
贐錢任使此生貧到骨只留清白與人傳

李氏登州黃縣人鄒確母性貞慧而知禮足跡  
未嘗出戶限其良曰世聞用門功任管軍百戶  
戍古錢唐錢唐有湖山之勝方春時邦人士女  
競事游衍爲樂子確與其昆弟謀曰盍亦奉吾

母爲樂乎乃治游具請于母母曰爾爲我子乃  
獨不能以禮事我吾聞婦人晝不游庭而可遠  
適湖山事逸樂耶確等慙懼而退李氏有女嫁  
爲同邑周仲賓妻調賴之瑞金薄非辜就逮女  
仰天歎曰吾夫死必矣吾出門安適遂投舍後  
池水死談者咸謂得之毋訓云至正間世聞分  
守海寧有惠政及張氏陷浙西屏居硤石元亡  
不食死

陳孝女者錢唐人也父業儒嘗受勇爵漫游江  
淮間居胭脂嶺下乙亥兵火挈家永嘉山中悉

爲盜所掠僅留孝女十歲携之丐食以歸故居  
蕩不復存因寄五里塘舊僕家聞殊勝寺設粥  
供日携女子就寺丐食凡數月僧扣所以頗憐  
之俾留禪寮供榜䟽職時孫元師下李知事者  
東平人也頗知書亦寓寺傍暇日至寺必從容  
與僧談欲謀一士爲友僧以陳爲薦一見投合  
如久要館穀加厚其女亦得其家懽心居數月  
當仲春女子忽謂其父云吾母墓在故居側數  
年不至矣聞主人禁烟將爲湖山遊能乘此機  
一往拜掃否父以告李欣然與俱旣至墓所拜

道罷李偕携酒飲傍舍女悲泣不已勉之還則  
泣告曰北聞李氏將北歸吾父子必將從之父  
老子幼南北萬里何日可再至吾母墓下此所  
以痛也言與淚俱下父亦感痛而女蹣跚呼號  
聲振林木久而仆地視之腸斷死矣李義之因  
與墓隣歛而祔于母塚之傍云

昭慶寺戒壇蓋自國初澄照法慧兩律師奉  
上命而爲之而登壇授戒嗣其傳者非出部劄  
故有真戒壇假宗師之說

皇祖立法無非化民爲善之盛意近來遊衲往

往敗群以致官府崇禁非立法本旨也洪武五年正月十七日 皇祖宣諭衆僧云你和尚每去那城郭山林村落中將釋迦佛明經教典與他衆民說化他一方人民習善不來犯王法也是你出家人爲我 國家添力氣也洪武十一年五月二十一日 皇祖宣諭衆僧云如今爲僧的多不通曉佛法都要習學心經金剛經楞伽經晝則講說夜則禪定以深通佛法爲長其次依戒牒行坐違者論罪自是每歲三月三日本寺開設戒壇海內緇流雲集而民間好善者

亦皆皈依聽說佛法壇上設法座推其能通經  
典戒行高潔者升座談經陳具足戒僧徒俯聽  
或參究疑難從問條解人授戒牒一紙其文云  
佛法三藏以經爲首三學以戒爲先戒者寔三  
寶之舟航衆聖之街衢也論其行相則有二百  
五十之殊究其威儀則有三千八萬之別佛佛  
相授祖祖相傳持之則爲三乘證聖之基犯之  
則爲六道沉淪之本三世諸佛因此戒而證涅  
槃一切菩薩由此戒而成正覺是知究佛心者  
謂之禪非戒不明宣佛語者謂之經非戒不尊

故戒爲萬行之首衆得之源者也其五戒曰不殺生不偷盜不邪淫不妄語不飲酒其十戒則益之以不着花鬘纓絡香油塗身不歌舞戲娼妓不坐高廣大床不非時食不捉生像金銀錢寶又具足戒一百五十條皆載牒文得之者若士人之應舉中式云

佛書浩瀚罕求宗旨吾於杭州得三僧焉其言雖近易而樞要可窺矣圓修居鳳林白樂天從問佛法大意修曰諸惡莫作衆善奉行樂天曰三歲孩兒也解怎麼說修曰三歲孩兒雖說得

八十老翁行不得，衆中居虎跑。嘗示衆云：說得一丈不如行取一尺，說得一尺不如行取一寸。宗杲居徑山，嘗對宋仁宗曰：瞥起是病，不續是藥。不怕念起，惟恐覺遲。如此數語，不幾於近道者乎？

佛印禪師者，杭之蠟燭菴聖水寺皆其道場也。世傳其詼諧滑稽，而僧史亦眇其人不爲列傳。東坡貶惠州時，佛印致書云：子瞻負高材，遠放寂寞之濱。權臣忌子瞻爲相耳，人生如白駒過隙，三二十年功名富貴，轉眼成空，何不一筆都



勾尋取本來面目。子瞻讀書萬卷。而未知性命所居。不可謂之聰明也。努力向前。珍重珍重。觀此書。亦似乎近道者。惜渠所謂性命之旨。無從質難之耳。

皎如晦者。淨慈寺僧也。嘗作卜筮子詞。云有意送春歸。無計留春住。畢竟年年用着來。何似休歸去。目斷楚天遙。不見春歸路。風急桃花也似愁。點點飛紅雨。

孝宗幸天竺。及靈隱。有僧淨輝者。隨侍上。見飛來峰。問輝曰。既是飛來。如何不飛去。對曰。一動

不如一靜又看觀音手持數珠問曰何用曰念  
觀音菩薩問自念則甚曰求人不如求己孝宗  
大喜

彭文憲公筆記

翰林官惟第一甲三人即除修撰其餘進士選  
爲庶吉士教養數年而後除遠者八九年近者  
四五年有不堪者復改授他職蓋重其選也然  
職清務簡優游自如世謂之玉堂仙好事者因  
謂第一甲三人爲天生仙餘爲半路修行亦切  
喻也

五月五日賜文武官走驃騎于後苑其制一人騎馬執旗引於前二人馳馬繼出呈藝於馬上或上或下或左或右騰躑躅捷人馬相得如此者數百騎後乃爲胡服臂鷹走犬圍獵狀終塲俗名曰走解解解而不知所自始豈金元之遺俗歟今每歲一舉之蓋以訓武也觀畢賜宴而回

成化元年乙酉二月禮部請上擇日行耕籍禮田在山川壇之南十七日早上率百官先農畢釋祭服使服束耒三推戶部尚書馬昂抹青

箱後隨京府耆老二人馭牛二人曲躬按犁轅  
教坊樂工執綵旗夾隴謳歌一唱百和颺旗而  
行上秉耒三往三返如儀殊不以爲勞既畢乃  
坐觀三公九卿助耕公五推卿九推各用耆老  
一人傍犁而行是日時九推之列也俱耕推畢  
教坊向前呈應用田家故事觀畢乃賜宴而回  
時生長未親農事至是始知犁之入土淺深繫  
乎舉手低昂事非習不能於斯可見矣

廣西大藤峽蠻賊久爲害近年流劫兩廣尤甚  
議者咸謂宜調兵往征然自永樂以來但能威

之使不出未能破其巢穴及是遣都督趙輔僉  
都御史韓雍與內臣同往征焉用土兵爲先鋒  
出奇計破其巢穴謂其中盤亘數百里山澗險  
阻而桂州崖九層樓尤險峻官軍直抵其上磨  
崖紀歲月而還聞者殆以爲不世之功而趙獲  
封爵賞以此然班師未久而賊復集乃知前所  
殺者多賊黨而真賊避匿者又出是以謂識者  
有遺恨云但趙都督領兵往返紀律嚴明軍士  
在途秋毫無犯非他將可及爲可重也

灼艾新集上卷終